

天岳山館文鈔

天岳山館文鈔卷三十二

夏芝岑廉訪五十壽序

國家弼教之任內則刑部外則按察使司刑曹明允精鍊者方總辦秋審凡各按察使歲所上獄皆由部覆覈部之長貳多取厯總辦並踐中外習故事者擢任之與河務邊才並號專家學而軍機處尤爲承

旨出政之總匯焉蓋國初因明舊制機務出納由內閣軍事下議政王大臣雍正七年西北陞用兵始設軍機處簡重臣任之選通達政體者爲之屬曰章京軍機職掌在恭擬諭旨凡內外臣工所奏皆面取進止明發

上諭其奉

敕議覆者審可否以聞凡明發

諭旨皆下內閣以次及於部科若指授方略誥誡臺臣及查覈政刑之失當者曰寄信

上諭密封下兵部馳遞自立軍機處內閣之任遂輕內而部院寺監暨九門提督內務府外而各直省督撫學政提督總兵官鹽政權使各將軍都統參贊辦事大臣及四裔諸屬國有事無不總集又無日不召對

上所巡幸無不從而四方章奏亦皆以摺代本逕達軍機處其內閣本章率依例題達而已甚或內閣翰林院撰擬有弗當亦下軍

機處審定其繁重與魏晉六朝唐初之中書令五代之樞密院等  
然大臣面取進止後仍口授章京稟擬取辦俄頃間故章京之任  
尤劇非學有經法通知時務者莫克副其選若以刑曹兼章京則  
所履並樞要由刑曹章京出任按察使則尤民命所寄與總辦秋  
審同一重任也廉訪夏公生吳西世族少舉拔萃科官刑部尋直  
軍機兼總辦秋審處均能舉其職粵西淮北盜起羽書旁午公直  
樞廷前後十有三年機身四應所贊畫不可以言罄官軍平靜海  
克金陵削平捻逆露布告捷公皆在直有功三次得 旨優擢  
賞孔雀翎由郎中晉觀察來楚南未一年遂權按察使司事司職  
刑名公在秋曹久嫻律令洞中肯綮民自以不寃事無鉅細必躬

親而督治保甲尤力先是公之曾大父潤堂公守寶慶從祖森圃  
從父憩亭並仕湖南台司公恰繩其武昆仲五人任監司守令並  
有聲公獨以專家之學來福湘民異時敷歷中外掌秋官總樞府  
勸相我國家爲時良弼又豈僅吾鄉之厚被其澤已哉月之二  
十五日爲公五十初度屬吏躋堂晉爵而屬予侑以文予與公一  
見稱莫逆謹詳舉我朝立綱陳紀內外相維之永制以見公之  
才稱其官爲不負千載一時之盛也是爲序

方丕齋姻丈七十壽序

天下有名人有福人名人者立功立德立言志在三不朽非備歷諸艱莫繇動心忍性增益所不能雖其名在天下而身嘗汲汲未有一息之暇福人則不然席累世之蔭賞天倫之樂前有作也後有述也仰無愧也俯無忤也不必身都卿相而名在薦紳不必贊埒王侯而充然無幾微之不足不必巖居川觀洗耳沈淵而林泉之福煙雲之供養饜飫於畢生是樂也天之靳之殆過於王侯卿相卽三不朽之名人有時轉相羨也昔馬伏波勞官屬曰吾弟少游嘗哀吾忼慨有大志謂人生取衣食裁足乘下澤車騎款段馬使鄉里稱善人足矣吾在浪泊里西閭下潦上霧毒氣薰蒸臥念

少游平生時語何可得邪而仲長統作樂志論則以謂居有良田  
廣宅背山臨流場圃築前果園樹後舟車足以代步涉之難使令  
足以息四體之役不受當時之責永保性命之期如是則可以凌  
霄漢出宇宙之外矣烏虜以伏波筭兵走萬里取封侯印而當其  
積苦行閒求如仲公理所論卒莫能得其一二名人固不易爲哉  
不齋姻丈生右族家塢素封視仲公理所云良田廣宅固生而有  
之若馬少游所期抑不足言矣翁性恬淡讀古人書能見其大不  
屑屑治章句早歲通仕籍卽脩然謝世網以蒔花種竹自娛於園  
卜星厯之指皆能通其奧然非其人不與談也丈夫子四人或注  
學籍登仕版孫曾並見頭角可謂俯仰無憂極人倫之福者矣近

歲軍興吾鄉用戰績起家位封圻擁麾節者肩背相望五等之封  
爛焉然皆崎嶇戎馬間如伏波所太息求如翁一日之寬閑何可  
得也宜翁之不屑以彼易此歟今年秋爲翁七十生辰元度忝在  
懿戚辱翁知三十年每歲時臘謁翁於里第烹羔豚陳酒肴往  
往相視而笑邇幸告養山居得脫潦霧薰蒸之苦況爰舉馬少游  
仲公理所言以申耄耄期頤之祝魏鄭公云願爲良臣不願爲忠  
臣繇我公觀之爲福人誠遠勝於爲名人也翁得天獨厚固當如  
上古之大椿以八千歲爲春秋福與壽且不知所紀極矣謹書之  
以侑一觴



宮保一等威毅伯曾沅浦中丞五十壽序

聖清受命二百餘年。當道光之季。粵西盜起。踰嶺涉湘。圍長沙。不克。竄陷武昌。殘安慶。踞江甯。爲僞都。分黨北犯。蹂躪十數行省。疊更閫帥。環視莫敢誰何。吾師太傅曾文正公。治鄉兵討賊。轉戰荆揚二州之域。詰弟令宮保一等威毅伯沅浦中丞起相應和。決策東下。卒克金陵。殄賊無遺種。捷聞。同日冊封侯伯。錫宮銜。賞雙眼孔雀翎。海內外識與不識。下及婦孺。走卒罔弗知。文正及公名於鑠哉。近古所希觀也。然公佐文正成大勳偉矣。而其忠謀卓識上繫

宗社安危。則以克安慶後疾擣江甯爲尤偉。譬諸弈國手之先著

也。利鈍所爭，聞不容髮。脫稍遲迴，猶豫事有不可知者矣。何言之公起義旅，後文正四年，咸豐丙辰，文正在江西，逆氛大熾，江楚道閉。公叔兄愍烈公自鄂赴援，軍報始達。是年十月，公帥偏師攻吉安，逾年克之。尋克景德鎮，進攻安慶，以辛酉八月朔拔其城。是日也，太史奏日月五星合璧連珠。中興之運基此矣。當是時，江南大營早覆，逆燄熊熊，天動地岌。吳越並爲賊踞，今大學士合肥李公方自上海規蘇州，總督湘陰左公自衢嚴規杭州，而長江千里若三山若蕪湖，若大勝關，中關下關，金柱關，東西梁山，秣陵關，諸險隘賊皆築堅壘，戍以重兵。我軍稍迴翔其間，節節牽綴，賊守且益固。又分餘力固蘇杭，而吳越之復無期矣。公乘破竹之勢，舍枝

葉披本根。毅然直薄金陵。所謂迅雷不及掩耳也。方諸古名將。若  
項籍之湛船破釜。韓淮陰之背水陣。王龍驤之風利不得泊。王文  
成之直擣南昌。有過之無不及已。然而公之爲此。實犯天下之至  
難。蓋自句容師潰。宿將勁兵。漸滅以盡。彼六七僞王者。各挾數十  
萬之眾。方行江介。攔然自得。非具兼人之智勇。曷敢以孤軍入虎  
穴。再試不測之險。況金陵爲賊老巢。攻其所必救。蘇浙賊必回援。  
是使攻蘇浙者轉易爲功而已。獨趨危地也。文正公素持重。屢誡  
諸將毋輕進。自公外。誰敢執其咎者。萬一孤行已意。或寡眾不敵。  
俾道不能通。火藥礮彈不繼。勢且奈何。凡皆智巧之士所望而卻  
步者。公一切不顧。旣數克沿江要隘。遂進壁雨花臺。盡夷賊壘。糜

血肉之軀爭尺寸之士鎗傷輔頰不爲止亡何疫大作染者輒殆  
士或嘲笑而暮僵馴至爨汲皆虛刁斗息響物化者五千餘人公  
季弟靖毅公亦卒於軍而僞忠王李逆方帥援賊三十萬圍我軍  
數重公激勵將士苦守四十五日賊乃解圍渡江公復分軍北援  
江浦和含南援蕪湖太平凡七閱月乃少定其竄隧道也計三十  
有四穴皆壞於賊神策門之役城圯矣而功弗就最後龍膊之役  
始成大功儻所云精誠之至金石爲開者歟方事之殷公暴露堅  
城下一夕數起一餐數輟嘗人世未有之苦而目論者或反詆爲  
貪功爲輕敵爲暴虎馮河更有議且退師者公堅不爲動誓滅此  
賊乃止然後知公之堅苦卓絕天實篤生之以殄此虜也元虞

叩公方略。公曰：吾之出此，蓋欲爲蘇浙二軍抽釜底之薪，又以趙忠節死守湖州，莫能救，翼分賊勢，寓吉凶同患之誼耳。斯言也，九廟之神靈其鑒之矣。厥後忠節雖靖難而吳越功反先成，然則吳越之功皆公功也。烏虜亂之生也，始於人心之機變，巧僞各圖其安而予人以至危，上與下功利相先，縱亡等之欲，及患氣旣成，乃有兵戈水旱疾疫之變，使斯民日轉側於水深火熱中，而莫知所底。有忠誠毅勇之君子出而矯之，克已而愛人，決幾而定變，躬履險艱，拯生靈之阨運，一時氣機所鼓動，皆知敵王所愾，而以苟活退避爲羞。此文正與公所繇合羣力訖。王誅制百萬悍賊之死命，解東南十數州之倒懸，而綿我國家萬億年無疆之祚也。

豈不偉哉公歟。歷封圻以勞疾，乞假角巾私第，口不言功，深得古  
勛臣持盈之道。今

天子躬攬萬幾，眷懷勲舊，海內喁喁望東山復出。元度獨以謂不  
然，蓋使我公得優游林下，遂綠野平泉之樂，則必疆圉敕謐，海波  
不揚可知也。故轉以公之出處，覘時會焉。公勛在冊府，像在紫  
光閣，事在史冊，方略碑頌在億兆生民之口，功已成矣，志已達矣。  
卽再出何所加，不出抑何所嫌哉。歲八月，爲公五黜初度，邦人士  
躋堂稱祝，元度竊謂公壽。國壽民壽其身以壽世，固當永與天  
壤不敝，而其忠謀卓識上繫

宗社安危，尤在疾疇江甯之役。世或未盡知，故昌言之以侑萬年。

之爵焉

康靜齋年丈七十壽序

先儒有言以父母之心爲心則無不愛之兄弟以祖宗之心爲心則無不愛之族姓以天地之心爲心則無不愛之民物大哉言乎六經四子書之義蘊賅於此矣而人顧不盡能然者有我之私閒之也人止知有我則自私自利一切濟人澤物之舉皆謝不爲卒不至自喪其利不止抑何不思之甚邪今夫天地之心祖宗父母之心也祖宗父母無不愛之子孫天亦無不愛之人愛之則欲其皆智而不愚皆富貴而不貧賤而其勢不能故常於什伯千萬庸眾中擇一二人焉獨智之使迪眾愚獨富之使恤眾貧而此一二入者苟坐視眾子之顛連無告而不爲之所是大拂天地所以獨



厚我之心卒且同歸於盡而莫能久其理然也西銘曰富貴福澤將厚吾之生也蒙竊不以爲然蓋福彌大者責彌重憂亦彌深寒者待之衣飢者待之哺無告者胥於我乎託命如第曰厚吾生已也造物豈獨私於其人哉年丈靜齋先生生有至性七歲失怙事母夫人孝伯兄以食指日繁與先生析飭先生乃棄舉子業治家政修業而息之獨力養母不以累伯兄者三十餘年泊伯氏捐館舍諸從子相繼不祿家中落先生代爲綜理既匡既飭不數年累貲巨萬所謂以父母之心爲心者非邪先生自奉約而推解弗悵從子弟輩或不能自給輒計口廩之性敏者必資之使奮於學其或窮老無依則飲卹尤周至嘗誦老泉氏之言謂自祖宗視之皆

一人之身所分故不敢相視若塗人也道光丙午邑考舍將圯先生與同志醵金新之庇材勾工身獨肩其任縣南白竹水澧屬要津也先生募白金數千有奇築石成橋圯於水仍復之堅壯視前有加同治壬戌邑大水壞民舍無算先生買舟拯溺更以小舢舨糗糒徧餉餓者死則棺瘞之明年遂領眾新學宮又獨修甬道露臺買田爲善後計劉吉星明經館公家十餘年禮敬不少怠暇卽與注善書雕板行世讀而化於善者相踵也烏庠人者天地之心先生親親仁民若此曷怪天之獨厚先生耶先生仍世通華長君蘭溪孝廉蚤歲冠童子軍登鄉薦雖降年不永未竟厥施而亦蘭學博小蘭茂才均能繼其學行天之所以祚先生者富貴福澤方

興未艾而先生以今秋壽躋八豔神明不少衰語曰仁者壽仁之德爲元元者善之長也夏侯勝曰有陰德者必享其榮以及其子孫然則先生之美意延年豈復可以數計哉世之自私自利者聞先生之風其亦可以愧而興矣

李子白先生七十壽序

尉繚子曰人之不足天之有餘蓋顯名峻擢人所爭也子孫壽考天之所與非人力所可求也人惟善畱其有餘厚積而不尸其報斯天之加厚之也乃終畀以至足之境而轉溢乎其量傳所謂人定勝天其此義也歟李子白先生臨川華族先世以業鹺徙桂林舉甲乙科職侍從躋九列者相踵也洎先生之世家中落援例以從九品發粵東親老憚遠涉遂不赴官咸豐三年賊犯桂林先生捍禦有勞大吏疏畱粵西司權稅九年權興安少尉石達開率黨十萬由楚竄粵道興安邑令赴鄉治團練先生偕汛弁嬰城固守時有領兵官聞賊至先遁棄火藥礮彈數千觔先生護解至會城

桂林太守褒其才事平邑令論城守功優擢先生弗預也十一年賊復犯興安川餉四萬金過境先生星夜督解回全州州始知設備先生歸縣城已陷立號召鄉兵復其城遂奉檄代理縣事積勞廢寢食凡兩月以護餉功僅免失城罪先生意怡然也歷權灌陽宣化屬巡檢疏調粵東權順德屬巡檢事所至皆有聲尋改官鹽課大使加五品服歸計先生宦遊十餘載疊治軍務未一登薦牘殆所稱李廣數奇者歟烏虜軍興以來士爭以功名自奮其尤者立功建摩節胙茅土次則守土吏以乘城功膺殊擢循資平進亦不失美除最下則攀鱗附翼身未履戎行輒綴名剡牘中恬不爲怪卒之暴長之花再實之木其根已傷逮時移勢易向之隆然升

者往往一蹶不復振而其遲暮假蹇爲人所觝排者或拔起轉出  
其上蓋升沈寵辱得喪之途其無定局如此而自達人觀之直浮  
雲之起滅於太虛已耳先生不言祿祿亦弗及而其天懷澹定無  
幾微見於色辭而冢嗣蘭生太守卒以從軍躋膺仕政聲鬱起餘  
並策名仕版所以光昭先生之志事者正未有艾然則天之報施  
善人又何如哉先生篤孝友數參戎幄未嘗妄戮一人在官未嘗  
輕笞辱一人歲九月蘭生以長沙貳守權武陵縣事先生就養來  
楚值七豔生辰邦人士躋堂介壽徵文以張之昌黎不云乎人之  
進未始不爲退吾之退未始不爲進也然則先生之康疆逢吉非  
其善畱有餘所致耶雖然先生於人世之升沈得喪早視若浮雲

矣。聆斯言，未必不轉訾其淺也。

譚曉村先生七十壽序

孔子曰國家敬老則民作孝古王者之老老也庠序膠學異其地燕饗食禮異其文縞衣燕衣元衣異其服其敬之各以其制也如此而其所爲老者則又能束躬圭璧樂善不倦俾鄉人有所矜式以潛消其犯齒悖德之心所謂爲善一鄉而人薰其德者此也湘西譚曉村先生眞其選哉先生少失怙事母至孝以貧廢學徙業岐黃造請者雖丙夜必往遇窶人子反助以藥資鄉里皆稱善人母病禱於神願減算益母壽竟得請中歲失偶獨居二十餘年泊如也先生於星卜壬遁堪輿及姑布子卿術無弗精兼好寫梅竹願獨嗜勸善書嘗著閱世俚言詩及輯古格言感而遷善者甚眾



烏庠善人國之紀也。昔張魏公問學於尹和靖，和靖告以好善優  
於天下。朱子深歎爲知言。蓋善之量，徹上下，貫古今，固靡有涯涘  
也。范文正公不爲良相，願爲良醫。裴晉公在忠州，集古方以濟物。  
而蘇文忠沈夢溪亦各有方書行世。夫非善端所發，露歟抑歟？陽  
子有言：爲善無不報，而遲速有時。蘇文忠則又以天可必與不可  
必並論。獨至先生，則爲善獲報有捷於枹鼓者。嘗遇比鄰失火，延  
燒及所居。先生望空默禱，竟反風以滅。寢室梁傾，夢中若有人趣  
之起。廳事舊懸巨額，以朽墮。先生適過其下，皆無恙。天豈獨厚先  
生哉？好善之誠，所感耳。先生仲子藹，吾用戰功，擢郡司馬。封  
先生如其秩。先生今且七十矣。語曰：仁者壽。仁爲元德，元者善之

長也先生晚年究出世法篤信因果誦內典行導引術數十年罔  
聞其以善致壽也烏能測其所至哉他日繇毫蓋而期頤  
天子修養老乞言之典執醕執爵舉蒲輪束帛以徵耆耋微先生  
其誰與歸

黃海華觀察七十壽序

代

古道之不行於今也久矣。古之人質厚，今則浮囂。古之人剛毅，今則柔靡。是不古若也。古之立言者，道明於中而極之以藝，今則蟻悅而已。虛車而已。是文不古若也。古之學者爲己，今則爲人。古之仕者爲人，今則爲己。是學與政不古若也。然則當吾世而有力敦古處者，不必嚶嚶自異，獨能心追古人而從之，得非難能可貴者乎？有其人矣。而篤古者必戾乎俗，甚或不見容於時，而其人卒能獲上信友以得民，非尤難之難者乎？海華先生承黎洲徵君家學，弱冠登賢書，爲國子師。最後以郡丞筮仕湖南，權常德同知補寶慶。道光之季，新寧民李沅發作亂，總督裕祜公討平之。先生

預帷幄多所贊畫擢知寶慶府時粵寇漸棘先生築城浚隍積粟繕守備後數年僞翼王石達開率黨十數萬來攻迄不得逞以去先生經始力也郡人葺生祠祀之其守永州也地當楚粵衝賊往來如織先生內修外攘吏民倚以爲安在官五年賊卒不敢犯永會武岡新寧兩牧令妄以東安民變聞大府將勒兵勦先生祭其誣牘數上保以百口卒無事永人祠祀先生如在寶慶時同治戊辰先生再守永州寧遠有械鬪獄斃十六人先生按律治之無枉縱上官欲改從重比訟至數年未已乃知先生所定爲不可易也軍興以來豪僂之士乘時會立功膺節鉞茅土者相望先生從事其閒屢典劇郡卻勅寇晉秩監司而古道自將顧猶浮沈簿領間

眞儒之效幾不自於當世或疑古之道無所用於今某竊以謂不然所貴以古人自期者求無愧於神明而已詎以所施之廣狹爲加損哉先生質厚剛毅子若孫並能傳其學伯兄寶田孝廉早世撫兄子成立爲循吏有聲兩從孫同歲舉拔萃優行科可謂道行於家矣所著思貽堂詩古文卓然成一家言而其施於政事者又上下交孚若是然則先生道未嘗貶志未嘗不行也凡謂古道不行於今日者豈惟薄視今之人抑其自待者薄歟月之某日爲先生七十生辰敬舉先生立身立言及其政與學之抗心希古者昌言之以侑康爵世有知言者其必曰我思古人實獲我心哉

周瓊圃先生七十雙壽序

洪範言五福曰富曰壽曰康甯申之曰攸好德惟康甯則壽益域惟富則能好行其德義固相需也顧其言不及子孫或者疑焉不知古人之書鉤貫旁通稽疑之疇有身其康彊子孫其逢之語詳略可互見也抑豈獨書爲然哉詩亦有之旣醉之篇漢儒所稱備五福者也其云介昭明僕景命天祿亦旣備矣而必進之曰釐爾女士從以孫子兼及允嗣之賢焉然後知九五福之交卽具見於七稽疑之內證以旣醉一詩而愈信也然而備五福者難其人非真好德烏足以語此而旣醉詩所稱女士非實有士材又烏能佐君子膺多福永錫爾類而致子孫之從也哉同郡周瓊圃先生德

人也性竺孝友好施濟遇歲稔蠲租減糶無恹色有困貧鬻婦者  
完贍之艱窶不能嫁娶者飲之待族中嫠婦尤加意任卹其他造  
橋治道建亭設義舟施藥餌善舉不能畢數德配易宜人咸脫簪  
珥贊成之殆所謂富好行其德者耶咸豐丙辰寇亂作鄉人扶老  
攜幼爭奔避適山水漲無舟可渡先生急買棹濟之所全活亡算  
軍興數載戰骨纍纍暴原隰乃築叢塚瘞之先生以經術垂訓子  
若孫並以學行發聞詰嗣荷渠學博猶子芝房刺史小溪太守皆  
鬱負時望先生以芝房貴膺封誥當六十初度時王子壽比部  
旣爲文壽之矣今年秋夫婦並晉八豔都人士來徵言以侑觴余  
謂士無論隱顯但心存澤物能有益於時乃不虛生此世先生好

行其德至老不倦是則天地之心之所寄造物者必因材而篤焉  
宜其壽且康也宜人疆俛同心以作德曰休爲盡道則旣醉詩所  
云女有士行者微且久又誰歸余與先生未識面然聞先生邃於  
經術爰舉箕疇五福之義以祝期頤且爲之歌旣醉先生聞斯言  
其以爲然乎否耶



彭麗崧親家七十壽序

麗崧先生六十初度元度嘗爲文壽之矣其時奉命帥師援黔門客爲屬稿加點竄焉耳未罄所欲言也今先生壽躋七艷尤不可以無言昔宋儒靳裁之謂士品有三志道德者功名不足累其心志功名者富貴不足累其心厥論偉矣顧靳氏之論本於晁氏客語而晁又本諸孟子孟子言事是君則爲容悅志富貴者也以安社稷爲悅志功名者也若天民大人志道德者也夫富貴非吾輩所期固灼然可共信矣至功名則有運會以主之得其時則乘機赴會筭兵走萬里取金印斗大甚或徒步起家積首功躋位將相雖下中如李蔡亦列侯封世或震其名以謂管葛之亞實則平

平耳其致此蓋有時命焉不可得而強也惟夫潛心道德不爵而尊不祿而富不必聚徒講學標宗旨以爲名但能刊落浮華日以義理養其心斯所得在性命之表先生少席厚蔭逾冠舉京兆試登仕版未必無志功名以母夫人年近百歲依膝下終其身遂不謁選壹意課其子若孫子孫並能率其教以學行發聞於時嘗建家廟立義塾倡葺大宗祠身爲宗老數十年族仰信服之有不善恥爲所聞知也晚益潛摯經學註周易取漢唐已來說易諸家博觀而翫取之都數十卷殆所謂擇之精語之詳者邪烏虜易爲寡過之書吾夫子加年學易之歎時年幾七十矣其曰五十以學易者大衍之數五十河圖中之所虛也惟五與十參天兩地而成數

合參與兩成五衍之則成十五者十其五十者五其十參伍錯綜以盡之理與數悉在是矣不必如宋儒者之改經以就已說也先生以七十之年學聖人之學則所爲窮理盡性以至命者不卽於學易得之哉先生世承壽種大父月中老人以七葉衍祥被旌表尊人戶部公吏瀕有異政今請祀名宦第四女以貞烈荷旌表得旨建專祠皆世德之尤偉者至其子若孫趾美科第則又近於富貴之說不足爲先生侈矣元度居恆以先生爲師法初亦嘗妄意功名而才劣遇蹇汔無所就今老矣日讀四子書差覺意味深長顧於道德之蘊茫乎未有聞也願得屏人事從先生受易備隱天華幕阜間深衣撰杖觀辭玩占如日侍申公伏生轅固生之

側以義理相餉遺先生其許我乎

楊履中先生八十壽序

箕疇陳五福一曰壽所謂壽者匪第安常履順多厯年所已也必其身嘗備厯諸艱而終不失其所受於天之生理夫而後疾厄不能災水火不能敝大兵大劫不能侵而天之眷之也抑若獨加厚焉史稱劉通母失明通孝養三十年不懈母目忽復明王思聰父病瞽思聰事之至孝父目亦明知人定可以勝天也史又稱毛寶得白龜贖放之後戰敗投江如躡巨石抵岸乃知其爲龜李進勅嘗放生魚及渡江舟覆足若有所履乃魚數百頭也乘之遂達岸繇此觀之天人感應之理捷於桴鼓人必能自壽其身而天乃壽之壽願可倖致哉履中先生生金陵世族尊甫 贈榮祿大夫景

蘧公爲邑名諸生先生幼承庭誥不屑屑治章句年逾冠效白圭計然術薄遊湘中抵鄂渚遭疾而瞽乃返白門靜攝三年日復明自是益泊然於世味不以外物撓其心命仲子鏞堂觀察繼其業而道然自放於山水間咸豐初賊陷江甯官軍圍攻之居民倚爲固居數年師潰丹陽賊如虎出柙先生鄉居賊驟至避之弗及身被四創奮身投水自靖長君夫婦及其子並以救父遇難先生漂而不沒獨亡恙乃避地姑蘇凡二年當是時鏞堂質遷楚南業已隆隆起及道稍通乃得迎養來長沙咸豐八年秋也先生來南日以種花飲酒課孫爲樂敕斷家事不相關白殆莊生所稱人貌而天全者歟今年秋九月值八十攬揆之辰余惟先生少擥目疾卒

復明。眡劉通王恩聰。或得之於親。或得之於已。其道一也。至投江不死。則必有神者。陰相之。其獲善報。與毛寶李進勅無少異。古人謂陰德如耳鳴。已獨知之人。無知者。先生所以得此之故。先生不自言。人亦無從得知。然非彼蒼陰相之不及此。不然。軍興以來。螻蛄蟲沙。不下數十百萬矣。先生獨如魯殿靈光。歸然天際。夫豈偶然哉。先生有孫四人。長次筮仕郡丞。三爲光祿署正。其敏於讀者。行且以科甲自奮。先生安富尊榮。晚福正未有艾。回思二十年前。始願當不及此。然及此。非倖致也。其得天獨厚者。抑皆其所自爲。所謂自作元命者也。譬如論大德之舜。曰必得其壽。不於徵庸陟方。時必之。早於風雷井廩。時必之也。先生當有取於予言。

劉韞齋撫部七十壽序

代

一代之隆必有鴻達魁壘之臣入則毗贊綸扉文武維憲出則秉  
摩建節不有顯功在疆圉而又聰強純固坐享大年爲朝野所宗  
而繫中外蒼生之望符子稱齊太公壽百六十歲路史稱召康公  
壽百八十歲而召穆公衛武公壽皆不下百歲降自春秋其時名  
公卿若季文子蘧伯玉延陵季子之徒考其年皆百歲上下書稱  
天壽平格豈不偉哉韞齋先生繇詞館起家

文宗御極之初濟寧孫文端疏薦公可大用以編修督學湖南比  
還朝已洊陟閣學矣先是公分校順天鄉試三典粵西鄉試一  
至是同典丙辰會試遂擢少司空遷少宰衡文之任靡弗與又數



銜

命出按事所奏當輒稱

旨尋充經筵講官國史副總裁枚卜可戾契致矣亡何爲忌者所讎

穆宗皇帝燭其誣起充實錄總纂官授鴻臚少卿調太常尋以太僕卿典江南鄉試未幾除閣學權京尹同治六年巡撫湖南距公督學之歲一星終矣始公之來視學也用經術造士論者謂自昆明錢通副後惟公足踵其美尤精人倫鑑拔今山西撫邵威毅伯曾公於諸生中迨公典試江南則曾公已建旄節拔金陵矣公旣撫湘重葺嶽麓城南諸書院士風爲丕變會黔苗稔亂搖蕩我

邊陲公易將整軍架入其阻遂若鼓洪鑪以煇枯蓬迄今園晏  
然公之力也解組後僑寓湘垣殿門讀經自樂微特湘人士不能  
忘公公抑有不能忘吾湘人者歟歲三月爲公七艷降嵒之辰湘  
之賢屬士紳爭擬酌兕觥介麋壽不遠數千里預徵侑爵之文余  
維公以文學真身沐

四朝之雨露敷歷中外所竦有名績自道光辛丑入詞林今二十  
科矣後進仰之如魯靈光歸然天表誠繇遭際

聖時明良一德眠太公召公所遇未遑多讓若文字伯玉輩且當  
過之矣夫凡伯家父爲大雅舊人春秋貴之

今天子闡繹斟元圖任舊人共政異日安車蒲輪徵入政府調泰

鴻幹元化·猷福貞貞·安在中書二十四考之盛業·不再見今日哉·  
某在部民之列·方提師絕大漠·未獲躬進一觴·屈指季春和煦之  
辰·引領南望·見榮光慶雲·蓬蓬然起於南衡·壽嶽之巔·與五華點  
蒼相輝映·是卽我公攬揆添籌之瑞應也夫·

天岳山館文鈔卷三十三

劉蔭渠督部六十壽序

南戒之山莫峻於衡嶽衡之脈來自岷山緜蜀而黔而粵西至騎田嶺入楚逕邵州所屬新寧城步諸縣乃盤折爲衡山韓子曰衡山最遠而獨爲宗其神最靈其水土所生白金水銀丹砂石英鍾乳橘柚之包竹箭之美千尋之名材不能獨當也計必有魁傑偉人出其間顧自三代汔漢唐楚之南迄宋大顯也近歲軍興江忠烈公始顯於新寧曾文正公始顯於湘鄉自是環才焱起茅土節鉞旂常俎豆之盛甲海內論者謂衡嶽洞庭之氣旁礴鬱積數千年大發其奇於今日然皆自兩公倡其始忠烈江公之勛勩遐哉

天岳山館文鈔

卷三十三

壽序

一

禪矣而當其時勦力以爲之佐者則今雲貴督部劉公也公生有異稟年十四補弟子員餽於庠讀書嶽麓十二年舉道光己酉拔萃科咸豐壬子粵逆稔亂朝命重臣出督師忠烈帥民兵往助剿世所稱楚勇者也忠烈聘公入戎幕事無小大必咨之旣自領一軍以討賊忠烈守南昌城公與羅忠節赴援遂解吉安圍平泰和土賊亡何忠烈殉節廬州公援之弗及益奮然以滅賊自任矣乙卯夏賊陷東安公與王壯武攻克之賊走新寧爲公所破又與壯武同克郴州明年詔公帥蕭壯果諸軍援江西遂復萍鄉萬載分宜尋拔袁州克新喻進規臨江丁巳秋僞翼王石達開自撫州來援公破之太平墟遂克臨郡明年大破石逆於新城己未春

石逆自南安入楚陷郴桂圍永州公帥楚勇大破之圍解賊以全力犯寶慶公與李勇毅分統東西兩路援師破賊數十萬石逆解圍西竄公追敗之於九鞏橋於白楊埔於大臨橋鹽洪司賊竄粵陷興安靈川直犯桂林公倍道赴援賊不虞公驟至也解圍竄陷慶遠公仍追擊之所嚮皆捷詔授廣西提刑使仍督師討賊晉承宣使柳州平擢撫廣西壬戌命總制兩廣未幾擒寇擾畿甸詔移督直隸兼節制山東山西軍務在畿輔數年

兩宮皇太后

穆宗皇帝深倚畀之每召對漏數下乃出賞賚不可勝紀會

事盤錯歸中途

特詔賞二品服辛未起廣東巡撫調廣西公舊治也吏民喜公至若赤子再依慈母焉居數年百廢具舉

今皇帝嘉其績擢督滇黔烏序明良一德之盛可謂至矣昔者周室中興於雅有江漢常武車攻吉日諸篇其時宣力諸臣若方叔召虎申伯皇父程伯休父仲山甫尹吉甫之徒莫不鏗鎗震難盪人耳目而吉甫之頌申伯則又推本其發祥之自故其詩曰崧高維嶽峻極于天維嶽降神生甫及申夫非以扶輿蜿蟺之氣實應運而產偉人歟公所居鉅衡嶽甚邇軍興已來就公一邑計之建廟節膺疊寄與荷易名之典者不可選紀盛矣哉光嶽之秀靈

幾若盡萃於茲邑矣公忠誠篤渠尤上邇

聖心異日援湘陰左伯相故事 召躋黃閣弼我不丕基中書二  
十四考之盛殆將再見於公哉抑又攷南嶽舊隸長沙長沙一星  
在軫中主壽長子孫昌故衡山一稱壽嶽公仰承世德丈夫子四  
人或秩二千石或爲名諸生爲任子爲孝廉詰孫未冠注學籍然  
則南嶽洞庭之間氣卽其鍾毓於公家者抑猶未艾也歲十月爲  
公六艷降崧之辰陳展堂觀察奉檄治饌於長沙將率寮屬稱壽  
而屬元度爲之辭元度未冠與何龍臣太僕唐義渠中丞共研嶽  
麓卽識公從兄原濬與公爲同年生往歲起官滇臬又公屬吏也  
謹稱詩崧高之義見公之生有自來宜與甫申爭烈因展堂以達



於公且致臺萊之祝焉雖然公所謂邦家之光非閭里之榮也抑豈吾鄉人所得而私者邪

黃昌岐軍門六十壽序

賈子曰天下安注意相天下危注意將將才之生天爲斯民計耳天下有大變則大才生是故唐有安史之亂則生李郭有朱泚李懷光之亂則生李晟馬燧渾瑊宋有僞智高之亂則生狄武襄有曹成楊太之亂則生韓岳明有土木之變則生于忠肅有宸濠大藤峽之亂則生王文成而其所生之才之小大壹視其時變之小大以爲程無古今一也

聖清受命二百餘年安且治矣越咸豐初乃有洪秀全楊秀清之亂而淮北奸民應之曰捻匪其變殆甚於唐宋明中葉天旣篤生曾文正昆仲泊伯相李公左公削平羣醜弼我不丕基而同時戮

力濟巨難者。自侍郎彭公督部楊公外。提督長江水師黃公。其最也。初公以材官隸文正戲下。余襄事戎幄。一見如平生歡。甲寅靖港之役。水師潰。文正自投於江。以救免。時所部皆潰。公問事尙可爲否。余奮褻曰。賊無不滅之理。在吾輩努力耳。公矐之。尋隸水軍方監造戰船。有龍降其舟。色正青。長五六寸。隱見儵忽。余曰。此黃河廟中常示見者也。隨文正往觀之。信嗣是公每戰。龍見則必捷。公之厚得天助有繇來矣。公初領一營。辛酉秋。詔公總統淮揚水師。遂於彭楊所部外別樹一幟。同治壬戌。從克安慶。又攻克江蘇。瀕江各府縣。進屯滬濱。得。

旨授淮揚鎮總兵。

賞穿黃馬褂。守江南提督。明年克蘇州。遂帥。

師援浙所過府州縣皆下。又明年官軍克江寧粵逆平。文正奏立  
長江水師。詔授公提督節制水師五鎮。亡何擒寇棘公帥舟師  
進剿淮北抵山東。所嚮皆捷。戊辰秋官軍蹙擒寇於燕齊接壤之  
運河。時河水淺躍馬可渡。公禱於龍神廟。禱畢舟中龍復見。水不  
雨而漲。驟增五六尺。賊突圍不能遁。遂爲官軍所殄。擒匪平。詔  
繇騎都尉加賞一等輕車都尉。尋併爲三等男。公督水師十年。長  
江二千餘里。枹鼓不驚。中外想望風采。念止足之義。上章乞致政。  
角巾私第。口不言功。見者不知爲元勛宿將也。先是夔門鮑公超  
夫婦來長沙。以貧故謀生計不就。久之貲罄。存錢止數百。鮑故烈  
士。以錢市酒肴置醕。將與其夫人飽飫以死。鄰嫗知之以告公公

破門則戶鍵矣。毀門入。鮑夫婦方舉箸。公問何爲。以實對。公喟曰。壯士奈何效匹夫匹婦死溝瀆。鮑曰。奈絕食何。公曰。子主我隸。名軍籍中。豈惟不死。且可圖進取。王侯將相庸有種耶。鮑泣拜。公亦拜。遂逆以歸。不數年。鮑繇步卒起家。官浙江提督。封一等子。爲時名將。微公不及此也。光緒丙子。余遊金陵。訪公於府第。公置酒話舊。懽甚。今年九月。爲公六十生辰。邦人士屬余爲壽言。烏虜公名在天下。海內識與不識。爭以郭李韓岳比公。豈藉余言爲重。然竊自謂知公者。莫余若也。凡公軼事。皆得諸面談。龍則所目擊者。余不表而箸之久。且無復有能言其事者矣。然則公之雄才偉略。所以佐文正諸公。削平大亂。而與唐宋明諸將才爭烈者。非得天

獨厚誕生有自來哉詩曰維嶽降神生甫及申又曰樂只君子邦  
家之基禕哉言乎謹誦之以爲公壽公將必听然而舉一觴也

張南瞻方伯六旬晉一壽序

古豪傑之士莫不有超世之志。張留侯掉三寸舌爲帝師及天下  
定。乃從赤松子遊。李鄴侯建補天浴日之功。卒以白衣棲衡嶽而  
謝太傅。心在一邱。史稱其寢處有山澤閒意。豈矯情哉。功名者時  
至則事起。常若不得已而就之。要必有芥千金。屣萬乘。不屑屑酣  
篆於富貴之意。斯視已重而視物愈輕。其心雖不敢忘天下。而常  
超然遊於昭曠之域。程子謂堯舜事業猶浮雲之過太虛。其意量  
固如是也。求諸並世之英。其惟南瞻世丈乎。公生負異才。秉庭訓。  
未冠注學籍。魁其曹。應行省試。不遇家貧。甚壹不以屑意。獨好爲  
詩。有天授高者入王孟之室。粵賊起。從江忠烈殄寇於瀏陽。歸益

天長山會文金卷三十三  
號召鄉曲子弟以兵法部勒之。膊賊扞國邑倚以爲安。而會城東北門戶以固。駱文忠深器之。旣而曾文正辟入江皖。領偏師。屢樹戰勲。逾年。侯官沈公疏調江西。接領平江軍屯信州路。未幾移虔州。所嚮並有功。新寧劉公檄權贛南兵備。使吏警民。歛政聲流聞矣。會湘陰左公移督秦隴。疏調公偕行。

詔擢甘肅提刑使。初入關。壁鳳翔。所部不及二千人。當逆回數萬。眾扼吭拊背。賊死蹕不能入。尺寸亡。何以疾歸。歸途陟華嵩。躋秦岱。所過畱詩紀歲月。尋出游匡廬衡嶽武夷。其詩益奇。以肆疾瘳。詣闕蒙召對。

文母



冲聖溫諭有加。遂除福建提刑使。隸任數月。百城爲之肅。會有所不自得。再引疾歸。公之難進易退。有未易窺測者。蓋至是年亦六十矣。邦人士擬躋堂稱祝。公復出游以避之。自江漢達廣陵。尋入虎林。泛西子湖。走山陰道。上探禹穴。蘭亭。又取道太湖。出胥臺。訪生公石。飲惠山泉。掠金焦。以入秣陵。數千里奇勝。盡入奚囊中矣。烏庠公之爲此。豈好勞哉。人世勳名富貴。旣不足以入其心。而庸庸者又多不可與處。則惟以山川爲性命。以煙雲爲供養。差足與吾精神相映發。而一吐胸中之奇。昔人稱州有九。歷其八。獄有五。登其四。兼之者惟公耳。或謂公年未篤老。精悍之色猶見於眉宇。天老其才。蓋必有以用之。然公之獨有千古正不在此。就令東山

再起勲業塞兩儀與畱侯鄴侯及謝太傅比迹公視之若無有也  
詎以是爲加損哉元度辱公知最深其知公亦自謂不淺敢約舉  
公之志事爲文以補壽之吾聞君山爲第十一福地神仙所窟宅  
而天岳者又所稱二十五洞天者也所產芝朮足以供服餌龜鶴  
足以資控馭然則靈區棲息故都大可懷矣何必遠遊哉抑又聞  
古之仙者若安期生廣成子泉梅子真徐元直葛稚川之徒皆身  
肩當世之任最後乃證仙籍吾輩豈多讓焉繼自今逝將從公於  
二山中辟穀導引曠然與造物者遊壽且莫知其紀也其以斯文  
爲小山之息壤可乎

湯德齋七十雙壽序

余讀唐人說部有李叟者夫婦均嗜善誠達上蒼有神見於夢傳  
帝命問所欲叟再拜曰某無他欲但得衣食裁足居山水清絕處  
身無病子孫賢且孝畢生無求於人願足矣神搖首曰此上界神  
仙福非若尋常富與貴可戾契致也此雖寓言然其理確不可易  
蓋嘗縱觀今古凡身都將相筦樞密及擁麾節膺臺寄下及有司  
百執事率皆質明泣政汲汲顧影鐘鳴漏盡夜行而不休以視隱  
居自樂賦考槃栖衡泌超然萬物之表相去爲何如邪然而知其  
樂者卒鮮莊生所謂嗜慾深而天機淺也求之並世若東陵湯德  
齋先生其殆庶幾乎先生爲旌表百歲漆山翁之孫世有潛德

少孤讀書不屑屑章句爲文法大家試有司不遇卽絕意進取嘗  
飲軍饌援例貢辟雍非其好也晚益耽詩酒課子若孫讀亦不期  
以科名卜築湄水之上蒔花種竹彈琴以詠歌先王之風時以古  
高士目之性尤豪邁不問家人生產德配姚孺人內修蠶織外課  
耕穫修業而息之時用以濟急周貧乏戚族有窶者畀以金俾營  
生計遇時疫則捨藥餌以活人道光己酉歲大禔傾困食餓者計  
口授粟自夏徂秋乃已然後知先生又非忘世者流置民物於不  
問也光緒丁丑秋爲先生夫婦七秩生辰其女夫周生靜虛以祝  
嘏之文請余攷東陵逸士在宋有陳雲岫先生隱青林洞屢薦不  
起顏所居曰眞隱明季有楊千仞先生隱大雲山構暇耕亭以居

先生儼其流亞歟。然則唐李叟所稱先生蓋皆奄有之矣。抑又聞洞庭之山，帝之二女居之。山浮水上，其下有金堂數百間，四時聞金石絲竹之音。又有石穴潛通吳之包山，爲仙靈所窟宅。先生居湄水上，密邇洞庭，正山水清絕處。道家所稱第十一福地也。先生呼吸湖光，養真葆素，從此壽過期頤。踵漆山翁之芳躅，如劉綱與樊氏，且當於神仙中求之。吾惡能測其所終極哉。

凌雲槎太守六十壽序

同治辛未展重陽余柬同邑致仕諸君遊葆真觀續宋九老會時  
雲槎太守年五十有二次居九各爲詩鏤石嵌壁間今忽忽九年  
矣君以今年十月躋六艷眾徵文以侑康爵先是道光甲辰乙巳  
間君筮仕鄂中余計偕北上往返必過君劇談竟日夕後除監利  
丞職司水利逾年江水暴漲齧護城隄潰在呼吸間時風雨雷電  
交作居民恟恟不保君躬帥丁役冒雨搶築或危之請少退君  
叱曰此何時敢惜身耶隄竟得亡恙亡何奉諱歸服闋晉郡丞會  
監利下游隄圯數百丈大吏發帑修復仍檄君典其事從民望也  
君櫛風沐雨杜胥役侵牟工竟無纖毫耗蝕民立石頌德焉尋攝

嘉魚縣事結宿獄百數十起有案十餘年不決者君壹斷以情法  
狂狴一清咸豐辛酉余治兵援浙甫成行僞忠王李秀成自江西  
竄陷通城崇陽諸州縣武昌戒嚴督撫官文恭胡文忠二公檄我  
軍出北界攻通崇克之時公私掃地赤立庫如洗君奉檄來軍持  
空名部劄勸富民輸餉市月得數千金軍賴以濟君尋以功賞  
孔雀翎晉階二千石同治己巳除德安府丞郡產石膏司稅者多  
中飽君鈎稽釐剔課入視前倍徙兼治榷鹽局除苛解嬈商民便  
之明年以憂歸自是不復出山矣君少能文郡邑試數列前茅不  
遇至是壹意課其子延名師主家塾修膳必豐長次三君聯翩注  
學籍又援恩例加四秩請封典贈父祖如其階闢園種花

并紫石爲山手一編日哦其中而於建義倉修考舍繕橋渡及平  
糶振貧諸事輒斥重金爲之蓋其性然也烏虜古稱三十年爲一  
世余與君交逾一世矣君生世胄無子弟之過需次楚北三十餘  
年塵氛一無所染性敏達通曉時務出足以宜其民處足以行其  
德子孫之賢且達又皆起而應之非夫得天獨厚又能本仁祖誼  
以養天和抑烏能俯仰寬然身名俱泰及是哉余少君一歲九老  
中二人居末座願與君同堅晚節日邁月征靳無嫌於在昔先民  
俾後之論者不至謂古今人不相及是則區區所願望而亦君之  
志也歟



余道齋封君七十雙壽序

光緒己卯冬道齋先生暨厥配王夫人同時壽七黻邦人士先期來徵侑爵之文余耳先生名甚久願自歸田後始識先生爰以先生行誼博諮於介眾僉曰先生有道君子也幼承庭訓劬於學從江經田先生游最久郡邑試數列前茅試學使院獨絀乃授例入胄監而壹意課其子叔子慎卿及季君勸甫先後注學籍爲名諸生先生傳經之心慰矣中歲隱於白圭計然之術王夫人蘊俛同心修業而息之家以隆隆起卜築西城極侖奐之嫩叔子繇郡丞加六秩封先生如其階先生受寵若驚翊翊如畏王夫人躬操作無改乎其初今皆七十矣而精力不後少壯此無量壽徵也余

曰懿哉淵乎壽富康甯先生殆兼之矣。僉曰未也。請詳其行誼。先生遇事有執持。尤仗義趨公。不以險夷易節。咸豐初。粵寇稔亂。軍饟絀。縣城初設。推稅局百務。草創梗議者多。先生與王吉士孝廉力肩其任。商旅翕然。歲權十餘萬。至今守其章不變。事平。敘按察司知事。非其好也。自軍興已來。鄰封苦寇擾。獨吾邑截然中立。如水之有坊。邇年百廢具舉。若有嬰與。贊同善皆不忍。諸堂先生皆斥重金。飲之。又以其間建書院。新學舍。葺公署。立義倉。繕橋渡。修祠廟。蠲助公車費。先生皆能爲眾倡。而歷年運米救荒。尤罄心力。殆所謂慕義無窮者耶。抑其心厚於仁耶。余曰。先生之福。端繇此矣。箕子陳五福。壽富康甯。繼以攸好德。德者所以致此三者之繇。

也五福雖未及子孫然已互見於七稽疑之疇其曰身其康彊子孫其逢正以子孫與康甯連類而及焉於何徵之於旣醉之備五福者徵之也其詩有曰釐爾女士從以孫子則并魯頌所稱令妻燕喜者亦賅之矣蓋能備是德始備是福也今先生黻珮偕老有令子以亢宗膝下孫曾復嶄然見頭角凡天倫樂事無弗備焉固當歸然爲吾邑魯靈光哉繼自今絲耄耄而期頤吾儕壽先生夫婦方且屢書不一書也於是眾皆額手稱善遂次其言以爲先生及夫人壽

封通奉大夫肖巖族丈八十晉一壽序

天子人以富壽康甯之福豈漫然哉必先予以沖淡之性敦樸不  
搖之識不斤斤於眾人所忻戚而適然有以全其天斯其植體也  
固而其受祉也自心逸而日休昔蘇子瞻銘王氏三槐堂以訓德  
修於身責報於數十年後如持左契之交手相付夫非人定足以  
勝天邪族丈肖巖先生廉靜寡欲讀書治樸學年三十始隸縣庠  
應行省試屢膺分校之薦不遇遂絕意進取壹意以教子孫爲本  
務曾大父松林公有隱德常客伍市拾遺金廉得其人返之事詳  
邑乘先生訓子孫常引以爲法性孝謹侍母疾累月不解帶尊甫  
東里公剛方寡色笑閭左憚之先生劑以和柔眾用翕服邑有大

興作必命其子出爲領袖歲祿則減值以糶或轉粟濟鄉人折閱  
不計也先生襟度夷曠視人世寵利無足關其念者而于若孫曾  
則皆騰達蜚黃能光昭先生之令緒冢嗣森嶢負幹濟才遇公事  
必罄其心力以籌軍餉固圉功洊擢郡丞加運同銜賜孔雀翎  
加五秩封先生爲通奉大夫次邁卿以高才生與弟作孚並晉  
郡司馬銜次振卿侯銓都閫次良才治舉子業有聲孫教凡養清  
甘霖相次入膠序餘皆玉珥蘭芽也人第羨先生晚福未艾豈知  
皆其厚積而流所自致哉今夫草木之承天澤也雨潤之而中然  
興矣日暄之風散之而賁然華且實矣迨至嚴霜隕堅冰至積雪  
封條向之姹紫嫣紅者悉澌滅以盡而其中有松柏焉其得於所

潤所暄所散者與眾同也。而其神落落然，其氣鬱鬱葱葱然。若未始有潤之暄之散之者，及鍊以冰霜而根柢乃愈固，貫四時而不改柯易葉。莊生所云受命於地，惟松柏獨也。是則先生所以厲歲寒後凋之節者歟？先生晚歲好靜攝，縣大夫擬舉孝廉方正科，不赴。八十初度，都人士約舉奉觴上壽，亦堅謝。至是八旬，晉一元度，乃始爲文壽之。夫世之以富壽康寧及子孫逢吉爲頌禱者，爲其未嘗有是而稱願之云爾。先生則旣奄有之，將何以壽先生哉？無已，則謹舉先生之自作元命，有是德而宜致是福者，見食報之非偶然，而並及九如之詩，所稱如松柏之茂，無不爾，或承者，莊誦之，以致臺萊之祝焉。

張萊潭七十壽序

古人言孝必兼友其在書曰孝乎惟孝句友于兄弟在詩曰侯誰在矣張仲孝友蓋未有孝而不友者先儒所謂以父母之心爲心則無不愛之兄弟也然而三代下孝子不絕書以友著者差少豈友果難於孝哉彼我之見明馴至自私自利斯不念鞠子哀也烏虜人特末之思耳今夫木之生也一本而已繇幹而枝分繇枝而葉分而華實又分其榮也悴也固極參差不齊之數也然而溉之者則不問其爲枝幹爲華葉爲榮悴之不齊而惟以力培本根爲務斯榮者益榮悴者不終悴若枝枝而別之幹幹而區之曰吾溉其榮者而已悴者不復顧也豈復有全木哉甚有爲之說者曰木

不能全榮也。必其枝幹有悴者。斯榮者得專。雨露之養。是直自撥其本根而已矣。兄弟同出於一人之身。是以一物析而爲二。爲三。爲四。猶木之以一本析而爲幹。爲枝。爲華。葉也。兄弗友於弟。生我者有餘恫矣。然則匪友烏云孝哉。常甯張某。潭先生生七歲而孤。事節母盡孝。有弟竹潭。生而瘖。先生時其寒燠飢飽。拊之如嬰。赤弟旣長。嘗揮斥數千金。先生夷然不訾。省人皆以爲難家。故不豐。先生修業而息之。漸與素封埒。比析筋與弟均之。纖毫不自私利。弟卒。撫弟之子如已子。一待次州同知。一與哲嗣超堂同注學籍。譬諸木。附萼相銜。聯枝競秀。夫豈有榮悴之不齊者邪。先生善行難枚舉。若葺宗祠。編家乘。設義倉。建培元塔。捐修炎帝暨城隍廟。



以及練國丁保境勸蠲以振晉饑得其一皆足以傳而予獨敬先生之孝友爲其可以風天下也昔周之中興尹吉甫薄伐玁狁詩人爲之賦六月旣極陳其文武憲邦矣而於來歸飲御時必引孝友之張仲爲重夫孝友庸行耳豈遂足以匡王國奏膚公哉而詩人必以是爲受祉之繇亦猶稱君陳之推本孝友也張氏本仲之裔先生其不墜宗風者歟先生初以軍績待銓知縣加六品銜頃超堂繇諸生晉部郎援例加六秩封先生爲通奉大夫歲七月爲七旬晉一初度超堂來乞言其請至再三不已特舉先生之篤於友以成孝者質言之以風勵薄俗焉

杜鶴田中丞五十壽序

冀州爲唐虞夏后氏故都河環其三面山有龍門呂梁恆嶽水有  
衡衛漳澤有大陸扶輿磅礴蜿蟺之氣代毓偉人遠者無論已卽  
在熙朝若蔚州魏敏果澤州陳文貞沁州田文端陽城吳文端  
太原孫文定暨壽陽祁文端諸公並得山川雄傑之氣垂光竹帛  
蔚爲名臣此外不可畢數繼之者其在太谷杜公乎公胎胚前光  
濡染家學逾冠入詞林咸豐戊午典楚南鄉試尋奉督學陝甘之  
命旣入臺建白悉關大計出守寶慶調長沙備兵辰永沅靖所  
泣皆有殊勩天子審其才可大受繇四川提刑遷雲南承宣使  
明年遂晉巡撫滇中寇亂甫定百緒繁興民力頗凋瘵矣自公整

軍察吏誠民如嚴冬霜雪後照以陽春掖困噓枯淳然以起又得制府新甯劉公方舟共濟殫力壹心聲應而氣求演亶遂以大治夫人臣最優之遇不出數端詞館也臺垣也文衡也連帥也節鉞封圻也數者得一已嶮然出其類而公早奄有之歐陽子所謂將相而富貴皆公所宜素有然則高身大猷不足爲公榮桓圭衮裳不足爲公貴惟德被生民功施社稷斯公之志而士亦以此望於公斯言也足以移頌公矣且夫天下之生久矣開國之始得賢輔臣翼贊之而天下以治迨物熾而豐蘖芽踰伏劇盜起而轢之則天下之治又將視乎其人有人焉鍾聞氣膺殊遇文武憲邦無施而不可繇是挺不世出之功俟海至之福用以綏靖履亶天下因

之大治而其人亦遂可壽諸千百世然則二百餘年間三晉之名卿碩輔若蔚州若澤州若沁州陽城開國名世之英也若太原若壽陽中葉賢宰輔也公生際中興景運宣力疆圉從此調泰鴻幹元化勛相我國家尤足綿無疆之緒而弼我不丕基也公敷歷中外垂三十年問其齒甫登五豔它日召躋黃閣歷中書二十四考庸詎使鄉先正專嬖於前邪公去楚已六年楚南士民謳頌公不置值公攬揆之辰相距數千里欲躋堂酌兕而莫繇也乃屬元度爲文以攄其忠敬詩有之樂只君子萬壽無期又曰樂只君子保艾爾後其序曰南山有臺樂得賢也得賢則爲天下基太平今聖天子得大賢以永太平而公復能肩艱鉅以爲民造福

則其必爲天之所福而壽以酬之固猶種之無不生炊之無不熟也繼自今公且與裴晉公富鄭公文潞公諸賢並推天壽平格又豈勵繼陳田諸公之名位云爾哉

熊鶴村署正八十壽序

嚴君平云州有九遊其八嶽有五登其四斯言也踐之者古今實難其人蓋山林隱遯之士足跡多不出里閭其達者宦轍所經勢亦不能周歷惟諸侯幕府客所處在仕隱之間而其神獨暇遊蹤所涖或庶幾焉然非有超曠之識登高能賦之才而又益以康強龐固之壽仍不免倦廢於中道也求諸並世其鶴村先生乎先生負異稟有弧矢四方之志少以京兆籍爲名諸生工詩古文辭當道禮爲上客羔雁溢於庭所主自臺吏學使至監司守令不一其人皆以義爲去就晚官光祿寺署正乞假歸自言足跡所未經者惟黔滇閩三行省耳攷禹貢九州黔滇閩不在列然則先生之履

齒固已遍九州矣。不懂如君平所謂遊其八也。昔人謂五嶽歸來不看山。宜先生之充然自得歟。先生聰強健飯。髮未全白。飲酒數十觥不亂。七旬外始舉丈夫子。今長與案齊矣。元度少耳。先生名自先生歸長沙。始修士相見禮。同治甲戌。湘人士暨官於湘與客於湘者。會集曾文正公祠。各以詩紀遊。并寫像刻石嵌祠壁。凡十有七人。先生以齒次居三。其後修稷於定王臺會者十餘人。先生居第一。蓋先生今年躋八艷矣。攷古耆英會。昉自白香山。預會者年皆耄耋。惟秘監狄兼謨。河南尹盧貞。年未七十。附末座。元度等得從先生遊。蓋援斯例也。然其時有李元爽者。年至百三十有六。則尤古今奇瑞焉。道光末。歐陽坦齋師訂湘中耆英會。十有八人。

作記圖像一時稱盛事顧自軍興後不遑及此矣近始稍稍賡續之復見承平風景而先生適歸然爲魯靈光非所謂吉祥善事耶昔太史公傳儒林稱伏生申公轅固生爲尙書齊魯詩師年皆九十餘先生皓首窮經精力不減少壯尤好行利濟事常不使人知史公所謂美意延年爲尤近之他日壽屆期頤

朝廷修袒割饋醕之禮蒲輪下徵行且奪申轅之席夫豈若濟南被召老不能行哉元度少先生二十歲足跡雖半天下五嶽止登其二茲同人壽先生屬爲之辭竊願踵元爽之武以無墜宗風俾得歲歲從先生於敦槃壺矢閒先生聆斯言計必軒渠撫掌先浮一大觥也



郭意城京卿六十壽序

古君子進退出處之宜皆內斷諸心而不與世推移其心雖未嘗  
一日忘天下而常若超然高舉不以功利職守桎其身故其進退  
常綽綽然有餘裕昔人贊東方生曰退不終否進亦避榮竊嘗三  
復之歎其於潛見飛躍間別成一格非淺近所能度量也嗣見意  
城京卿有小印寶鑑此語因躍然曰君殆深得其時義者歟君生  
有異稟十歲能文十二舉茂才甫冠登賢書與其兄筠仙侍郎齊  
名有機雲坡穎之目道光丁未侍郎入詞館君下第歸尋丁內外  
艱遂慨然有隱居之志咸豐壬子粵盜犯長沙君兄弟避地東山  
與今相侯左公暨益陽周承宣壽珊卜鄰團結鄉父老子弟爲守

樂計巡撫銅山張公辟君與左公同入幕贊畫軍務用君策平瀏陽徵義堂匪剿粵逆之分竄宋埠者湖外獲安張公權督兩湖復強君與左公偕行所措注動中機括會計臣仿古算緡及經總制錢法檄各行省立釐金局當事以君通達時務敦誥肩其任君乃慎選官紳規久遠杜侵牟前後權餉金累千萬而民無謗譴商旅通行至今守其法不變天下治釐捐無有善於湖南者繇始基之美也曾文正公帥水陸東征君嘗從文正入江西文正畱任以職事君辭歸念無以答文正乃籌立東征局於額稅外別徵東征餉卒成文正江南之績歷佐花縣駱文忠公歷城毛公陽湖惲公前後凡十年通民情庀防務厲軍政聯官紳之氣警將領之勇怯勤

情固圉援鄰當事倚如左右手先是直隸督部劉公疏調君入畿輔毛公擢粵督亦疏請同行而憚公以湖南需才特疏留之當是時君才望連著論薦者如爭而君退然不輕出迨憚公去位君不欲復與聞時事未幾景東劉公來撫湘黔苗事棘軍書纔午乃強起君入幕府及事粗定復浩然歸矣蓋君進退出處之大節略如此烏虜君以名孝廉待次鳳池才足任天下之重儻壹意進取節鉞封圻可立致循資平進亦不失爲達官乃其沖夷貞約如此謂君仕耶未嘗一日掛朝籍謂君隱耶而其才力精神所運量久已宏濟時艱而天下陰受其福蓋自軍興已來選將治軍率以湖南爲樞紐凡援鄂援皖援兩廣閩浙川黔及平定金陵皆得楚

材之力而非餽餉不爲功然則不言功而功固莫大也不仕不隱之間君則有自足千秋處東方曼倩避世金馬門君殆其流亞矣詎非不數見之奇局哉今年春君壽躋六豔詰嗣于潯都轉于寬郡丞洗腆稱觴邦人士徵文以侑之夫人知有用之用不知以不用爲用者其用尤神也龍行天馬行地用之顯然共見者也獨至鳳與麟則豈若無所事事者然然惟不出出則世以爲大瑞而天下因以致太平此豈可執尋常之潛見飛躍求之耶抑又聞東方生本歲星之精其壽與南極老人並然則君之壽尤不可以臆計矣君可傳非一端余獨敬其知進退而不失其正故陳此義以爲君壽質之筠仙侍郎計不河漢余言也

張力臣方伯五十壽序

成天下之務者才而已矣。才之至者，經天緯地，其次則肩任鉅艱，通知當世之務，以之治經史，則洞澈本原，卽出其餘技爲詩古文，辭其文采風流，猶足照鄰一世，皆才爲之也。論者謂清才多奇才，少此第就解章家言，世有通才，則必合政事文章而一之，斯無施而不可也。然而通才實難，非負兼人之秉，過人之識，曷足語於斯。故常數十年或數百年而始一見，今乃於力臣方伯遇之。君幼承庭誥，目濡耳染，於經學能世其家，卅角時出，語驚其父執，爲諸生究心經世之學，人謂科第可芥拾矣。會軍事起，當道譖其才，檄司餽餉，遇盤根錯節，益顯其能。張石卿督部左遷黔撫時，苗教匪並

熾餉源絕師餒而譁張公疏請分渝郡權稅之什一以拯黔疊  
詔可之而負重名爲川督者持不可乃請以全黔州郡割隸川湖  
爲子遺乞命又不可張公坐困待斃賴君勸輸以濟歲餉十餘萬  
金開關以達凡四三年築垣得亡恙代者得起而有功君之力也  
抑其才所爲也君以功繁擢監司

賜戴孔雀翎蓋與蕭鄴侯王茂宏劉士安爭烈矣未幾提師入黔  
會同楚軍平苗峇加承宣使銜

賞勇號君始終大有造於黔如此然性澹榮利不汲汲於進取也  
益讀書講求時務於輿地之學尤精凡泰西諸國及地名人之  
信屈聳耳者皆悉舉其辭無一字迂所著瀛海論二種不脛而走

數遊滬瀆與番酋上下議論能發明古義以折其角天下大政若  
河漕鹽皆能究極其利弊言之鑿鑿非才而能之乎性尤好客暇  
則集名流觴詠又以其暇續輯沅湘耆舊詩此才之緒餘也昔人  
謂分其才技足了十人君殆近之矣歲八月君壽躋五秩五十古  
所稱服官政之年也君負通才既超軼流輩而時局艱難更值需  
才之會乃者

明詔屢敕命閣部臺臣各舉所知以待不次之擢君之名已澈  
天聽矣韓子云學有經法通知時事微君莫副斯言也轉瞬徵車  
應

召出其宏濟之才以安內而攘外俾天下一覩通才之效雖與管

子並稱天下才可也。鄴侯始興公輩豈能專媿於前哉。會同人稱  
祝來徵侑爵之辭。敢舉君之才足匡時者。身勸爲之駕。卽以是爲  
君壽。



陳舫仙方伯五十壽序

昔昌黎韓子稱鄂州柳中丞出入行間與士卒均辛苦取先天下武夫關其口而奪之氣誠繇天姿忠孝鬱於中而大作於外故動皆中於機會夫公綽一書生耳昌黎心折如此此豈無本之學哉蓋必有兼人之才過人之識乃能宏濟時艱撥寇亂而反之正也並吾之世若舫仙方伯真其選矣君孺染家學讀書有卓識早歲能文會軍興遂以投筆立功自見從今威毅伯曾公帥湘軍克吉安又從蔣果敏公援廣西復平樂僞翼王石達開率黨數十萬圍寶慶君扼賊於祁陽力戰敗之時威毅伯圍安慶曾文正公檄君赴皖綜營務君塞樅陽水口斷悍酋陳玉成之援又敗玉成於東

流尋拔安慶乘勝規江南軍分四路進君領西路夜出奇兵襲奪江東橋盡夷其堅壘西路軍始得薄城前後攻克七鬻橋紫金山各要隘遂以同治甲子六月克江南君擢陝西提刑使調山西朝廷知君可大用因以晉防專屬君矣擒酋張總愚繇豫竄秦三晉戒嚴而秦豫紛紛乞援君以陸軍護陝州水師入渭河得

旨嘉獎然三晉河防夏秋易而冬難以冰堅可渡也先是賊踞同州君屯蒲郡扼之賊尋竄北山愈趨愈北皆與晉接壤繇河曲保德履冰渡河則宣大皆可危且闌入畿輔矣不得已舍南而北取道會城以達河保賊忽自吉州渡河而南君馳抵孝義鎮賊已先渡矣君扼韓侯嶺趨趙城賊敗竄平陽爲劉忠壯所蹶遂繇垣

出回竄河南君請與劉軍合期有

詔仍督晉防乃止賊之渡河也君以疏防自劾吏議奪職

特旨改畱任異數也當是時陝回稔亂詔君嚴守西河乃督所

部築邊牆七百餘里不別費公家一錢前後涖晉五年整肅綱紀如勅治墨吏某及濫刑斃命之臨汾令匿喪之吉州牧皆眾載口碑者也同治九年奉

命赴甘肅隨今恪靖侯左節相勦逆回時馬化龍投誠檄君赴金積堡察其真偽君議誅化龍而撫其黨進攻河州抵靜甯戰於太子寺別將陣沒賊張甚繞截官軍後路君擊走之尋招降巨酋馬占龍等十八人眾數萬馬桂元本元者兄弟也一守西甯一爲西

甯鎮總兵以謀反爲官軍所敗竄入巴燕戎格部君奉

詔深入積石關用計擒之解行省伏誅降回有叛者分別剿撫事  
遂定於是循化廳屬千餘堡皆降歸抵河州降回復蠢動君平之  
時甘隴惟肅州未下然賊勢已窮城旦夕可拔君乞假回里修墓  
詔許之蓋慮全隴肅清必再有 恩命不可以請故預乞歸也君  
歸爲善於鄉甚力他人得其一皆足自名君特餘事耳烏虜君前  
後所立功勩若此其視柳中丞古今人同異爲何如耶抑嘗論唐  
平淮西內地一隅之叛將耳昌黎與柳中丞書所稱靡弊困頓三  
州之地蚊蚋蟻蟲之聚惑兇豎煦濡之惠提童子坐之堂上奉以  
爲帥出死力抗逆明詔者也視近時之粵寇捻寇回寇眇乎小矣

唐人竭四年之力勵乃克之然且以爲奇功韓碑柳雅震耀鏘鏘  
至與江漢常武諸詩爭勝儼見君之從克吉安援粵西拔安慶復  
金陵平定甘隴微特昌黎稱鄂州所云行事適機宜風采可畏愛  
者不免變色卻步卽愬武古通不且畏後賢哉君勛業遑遑問其  
年裁登五十五古服官政之時也君精力方盛強未宜以東山  
老乃者鯨海波騰鄰壘狡逞時事頗多故矣  
聖天子圖任舊人共政節鉞封圻茅土其屬於君者固未艾也余  
辱與君交謹書此爲君壽且勸駕焉

方鑑垣姻丈七十壽序

吾平方氏世有達人南宋時明甫先生進師事李宏齋黃勉齋與饒雙峰共學叔行先生輒初事宏齋後及雙峰之門皆朱子再傳弟子今所祀十三君子者也而亮甫先生采又嘗與魯君子寶潭諸公作九老會鋏石道巖至今稱韻事云同治辛未秋余山居多暇屈指邑人服官中外歸林下者得九人乃相約遊道巖續九老會各爲詩刻巖石閒而余爲之記時姻丈鑑垣先生六十有七以齒序居四其詩有曰年年佳會羣賢集太古方回總率真蓋自道也識者謂率真二字實足以概先生生平焉先生累葉素封少能自奮於學郡試冠軍補弟子員餽米廩晚官醴陵訓導厯嘉禾永

定教諭泣官課士。豈以真意行之解組後。蒔花種竹。含飴弄孫。陶然有真樂。會粵寇陸梁。風鶴時警。先生治園練有功。

詔加內閣中書舍人銜。真儒之效。蓋略見一斑矣。今年長至後十日。屆七秩攬揆之辰。邦人士製錦屏稱祝。而以侑爵之言屬余。余維先生固明甫叔行亮甫三先生之族裔也。三先生距今六百有餘歲。而其流風遺韻。至今未沫。皆其真氣之不容泯者耳。人生上壽不過百年。惟其立身行道之實。上有以承先喆。而下有以迪方來。則其精神心術。常以一身而流貫於數十百年間。詩曰。樂只君子。德音不已。又曰。樂只君子。萬壽無期。匪君子之能無期也。其真性情之所流貫於先後者。德音固不已也。此仁者之所爲壽。十三

君子之所以爲學九老之所以怡性而引年舉不外乎一真也先生屏除塵累以自葆其真又有賢子孫策名仕版晉秩膺封誥晚福蓋未有艾今卽誦先生之詩以壽先生可矣繼自今長生久視繇耄耄而期頤疊續敦盤之會先生健步登陟神明不衰而余輩亦得撰杖屨以從其後十三君子暨九老之真樂當去人不遠也烏在今必異於古所云哉



王亦陶先生六十壽序

士大夫遭遇各殊仕隱兩途而已仕者數歷中外於禮樂兵農刑名錢穀無所不當問而或未暇爲專家之學隱則理亂不知黜陟不聞雖獨善其身而澤不究於天下於成物之義曠焉兼之者其幕府乎願古之幕僚自漢迄唐佐節度諸使者有行軍司馬掌書記及參謀等官宋之節度觀察防禦團練安撫置制轉運提刑諸使有參謀參議掌書記及主管機宜文字幹辦公事等官皆繇方鎮岳牧自辟而請列於朝者也近世大吏幕府則不隸朝籍繇主者審擇而禮聘之不稱僚佐稱幕客蓋在師友之間其尤賢者則相得益彰而所施乃益溥 國朝雍正中僉事陳潢佐靳文襄治

河至蒙

憲皇帝垂詢召對賜五品階方恪敏觀承爲平郡王記室洊擢至督部可謂盛矣今會稽王亦陶先生殆足趾美而無忝者歟先生少負異才讀書讀律能心知其意以養親故棄舉子業治名法家言郡邑大夫審其賢爭爲東道主先生一以義爲去就嘗欲徧歷名山水以廣其識而益發其奇乃入秦旋入蜀當道皆擁簪迎之客承宣提刑兩司使最久稽出內慎讞比數引經義決疑獄民自以不冤尤好誘接後進及門者眾或賦閒居則推轂恐後有自遠來依者必令得所乃已亡何蜀中寇警挈眷東歸過鄂中費詒雁者相踵也居久之粵氛近偪乃改而浮湘林未欲久居也然景星

慶雲莫不以先觀爲快。登爲諸侯上客。入提刑司署中。當事倚之。如右臂。前後修脩所入。歲逾千金。積數歲則篋以歸。歸見昆弟戚族之饗者。解橐中裝。舁之。輒應手盡。其後數歸。數散其金。且用以葺家廟。購祀田。修塋墓。詰嗣耦耕。司馬繇郡丞。晉五秩。詰封先生。二品階。可謂顯融而光大者已。今首夏。先生晉古稀。諸與先生雅故者。爭擬酌兕觥。躋堂來徵文。以侑康爵。余維古幕僚之遠著者。若權德輿之佐杜佑。許孟容韓愈之佐張建封。賈直言之佐劉惔。韋澳之佐周墀。溫慥石洪之佐烏重允。並彪炳史牒。然屬僚非今幕友也。至阮瑀陳琳輩。以飛書草檄見稱。尤不得與名法之專家比肩斯任者。一字之出入。一念之疏密。民命之生死存亡繫焉。而

壹意縱釋有罪又近於姑息容奸其不平也滋甚如先生之矜愼平恕固當於古人中求之歟昔于公自言治獄多陰德子孫必有興者令高大其門閭以容駟馬然則先生之麋壽熾昌正未艾矣余嘗一見先生蓋乎其容也藹乎其度也竊謂非仕非隱中先生自有獨立千古之處視昭代陳方諸公其迹不必同其賢一也故質言之以志膺服且祝岡陵焉詩曰樂只君子萬壽無期敢以是爲異日期頤之券

饒新泉通守六十壽序

古有大隱在朝市之目漢東方曼倩遂以避世金馬門稱蓋所謂  
吏隱者也然吾謂吏隱之高者莫如漢南昌尉梅子真觀其不辭  
卑官似柳下惠直言極諫似箕微比干及上書不報棄官變姓名  
入山修道世傳爲仙去遂有神仙尉之目今南昌郡屬分寧奉新  
暨吾平之梅仙山皆子真栖息處也然則其爲尉也殆有託而隱  
焉耳自功利之害深痼人心吏途益塵濁不可問能得吏隱之遺  
意曷曷乎難其人若能希風仙尉之萬一尤當絕出流輩甚矣古  
今人不相及也今乃於新泉通守髣髴遇之君本東鄉士族三歲  
失怙母太夫人矢志撫以成立少劬學讀古人書能知其意及試

厄於遇乃走京師供事閣部敘年勞以少尉發湖南非其志也然  
君轉以不舉其職爲慮常慨然曰人重官非官重人也以孔子之  
聖尙爲委吏爲乘田程子則謂一命之士苟存心愛物於人必有  
所濟吾敢自菲薄哉初權桂東尉屬粵盜跳梁君以治團練功擢  
主簿時鄉兵獲賊謀二君營之乃被掠而逃歸者力排眾論出其  
死尋授長沙少尉待獄囚恩威交濟時以善言勸化囚多感泣歲  
蠲清俸寒施絮暑施藥餌今二十年矣初杜中丞瑞聯守長沙偉  
君才檄權郡司獄而長邑囚卽肆無忌憚相搏噬上官以君善撫  
馭也檄回本任遂以帖然時君已晉階別駕加鹽課司提舉銜而  
王司徒文韶時方撫湘疏薦君以通判畱湖南補用崇方伯福主

計典復以卓異薦稱其宅心行事老成練達爲不可多得之員君遂由提舉銜加秩請二品

封贈父祖如其階德配王夫人稱

賢內助長嗣綏芝官粵西所蒞有名績葆芝培芝並爲名諸生藹芝官皖南印芝敏於讀駟馬之門且日大矣今年三月爲君六十攬揆之辰僚友製錦稱祝來徵侑爵之辭余惟君之仁心爲質眾載口碑有熊興林者禁錮十年矣君數白其冤上官營其非私遽釋之君復助以行賞余族子某本村農以從軍浚保干總歸撫標爲人所牽累愚訥不能舉其辭陷囹圄三年首禍者遠颺某終無出理亦賴君獲昭雪君之造福羣生類此者匪一端也然而人之知君猶其外著之績耳君天懷夷曠隨遇而安在官讀書課子常

若置身簪笏外者既重刻

欽定全唐詩

皇朝經世文編

縮爲袖珍本以餉藝林復集同志採輯道咸已來名臣魁儒有關學術政術之作勒爲經世文續編不脛而走海內烏虜茲豈俗吏所能爲者耶然則仙尉之流風遺韻君殆近之而更隱之目亦惟君之愛素好古爲足當之無愧色擬以東方生猶覺非其倫也謹質言之爲君壽且致無疆之祝計必不以爲諛也



文圖族兄六十壽序

古詩人之介壽也曰臺萊曰桑楊曰杞李曰栲栳曰楸枿取諸木者備矣然皆凡卉之品彙也獨天保之詩曰如松柏之茂無不爾或承解者謂舊葉未凋新莢已繼殆與夫子所稱後彫者同宜其繁衍而昌大也太白詩云我李千萬葉柯條徧中州若吾文圖族兄殆能挺後彫之節貫四時而不改柯易葉者歟君秉性公直與人交有終始不爲翕翕熱而夷險不渝咸豐初軍興佐尊府君藩峯先生治南鄉團練爲眾倡邑人起合防局捍賊君奉父命襄其事會霆營叛勇陷崇通縣北戒嚴君適以事至北鄙聞報亟部署鄉兵竭力搢拄比曉合防局師至界得完向微君賊早闖入矣歲

浔饑勞民倡議蠶食眾數千入君里君力持之趣守土吏來鄉諭  
遣越三日眾始散邑以無事管佐余帥師援江西繼防皖南備厯艱  
險以功保縣主簿 賞藍翎得五花之 誥贈及先人最後從援  
黔感瘴癘幾危爲人表裏如一嘗面折人過人終服之張子衡廉  
訪丁亦階司馬李湘舫觀察絕重其爲人寒畯某貧甚將不有其  
妻君醵金飲之卒爲名諸生吾族家廟在北城磬峯先生倡族重  
建閔麗甲一邑君繼爲總管條理井井集貲爲賓興費族眾賴之  
殆莊叟所謂受命於地惟松柏獨者歟且夫松柏之得天獨厚也  
其始芑芑耳九九耳無甚異於羣卉也卽天之所以潤之暵之培  
之者亦無加於待羣卉也而爲松柏者獨能于霄蔽日挺然於徂

徠新甫之間牛羊莫能踐斧斤莫能牋迨至閉塞成冬栗烈矣感  
發矣而其厯歲寒而不彫者自若也彼夫曲轅櫟社之木以爲器  
則速毀以爲門戶則液櫛以爲柱則蠹是以其大百圍而繁之可  
以蔽牛商邱之木拳曲不可爲棟梁啗其葉則爛嗅則使人狂醒  
是以結駟千乘隱將芘其所賴詎足髣髴其萬一哉君有賢子其  
二注學籍以文名膝下蓀枝嶄然見頭角君惟教之以忠信篤敬  
晚福正未有艾會君周甲之辰都人士與君遊者屬爲辭以伯康  
爵余與君所謂歲寒交也其視君直若楚南之冥靈上古之大椿  
以八千歲爲春秋也松柏云乎哉

李母何太恭人七十壽序

軍興以來楚之南獨以忠義敵愾聞天下其治鄉兵捍賊者曰團練團練之效以吾平爲全楚冠平界又以南江爲最衝咸豐四年三月粵賊刺武漢窟崇通以平爲楚南門戶悉銳來攻官民力禦之族兄湘舫及其兄東舉弟春林輩奉母何太恭人命殉鄉兵力戰平界得完越明年賊復窺平東舉奉巡撫侍郎駱公檄練兵協守會官軍失利通城勢危甚乃共約鄉父老誓死守賊尋敗去其後屢犯屢卻之賊遂不敢正視平矣當是時胡文忠撫湖北禮湘舫入幕府掌機宜文字凡四年積功繇訓導累擢郡丞以知府升用春林擢訓導加國子學正銜惟東舉辭賞以魯仲連自況焉賊

之犯平也。南江爲邑北鄙，有閒道出叢山中，距太恭人居二里許。時承平久，人不知兵，警耗至，男婦洶洶，鳥獸散。太恭人聚族戚謀曰：「賊遠來，主客勞逸，飢飽之勢殊。又山險可扼，能併力禦之，無患也。先去則禍無底矣。」且室廬墳墓皆在此，去將焉往？語未竟，聞左有挈婦孺踉蹌出走者，太恭人大聲斥之曰：「何物男子，不從眾殺賊，乃走爲？且室廬墳墓皆在此，去將焉往？於是走者慙而止，眾皆曰：「惟太恭人命，乃以意授諸子，聯絡里社諸壯士，築礮堡，繕器械，與山勢相犄角。越日，賊果從閒道出，鄉軍禦之初，少卻，湘舫等殊死戰，礮彈傷春林掌，血殷袖，竟不自知事急。太恭人親率婢媼及子婦，治炊爨，土銚下，揉束薪，指血沔沔下，炊竟，授負擔者，徧餉各。

堡砦時相持過午。眾苦飢。至是皆飽。士氣百倍。戰大捷。追奔數十里。自後平人聞賊至。三尺童子羞言徙避矣。蓋是役倡之也。同治二年八月。太恭人七十生辰。邑人士來徵侑爵之文。余所見並世豪傑立義聲樹奇勲者夥矣。吾楚尤錚錚然。皆士大夫及強將勁旅之徒也。至以一女子能定策捍大患。功在桑梓。則當世所罕聞。往讀秦風。至小戎傳者。謂以義興師。則雖婦人亦知勇於赴敵。慨然想見三代之風。彼猶強悍之國俗所漸漬然也。太恭人獨以義理之勇全其鄉邑。孰謂古今人不相及哉。昔甯都魏禧之傳秦節母也。述其言曰。年荒。眾人之荒。學荒。吾兒之荒也。兵亂。一鄉之亂。心亂。一家之亂也。禧太息以爲名言。使遇太夫人。其敬服當彌甚。

三才圖會卷之三十三  
矣太恭人事親孝相邁軒贈公有賢聲課子嚴他懿行不可僂數  
然皆女德之常余概略而不書特舉其敵愾知大義者見吾鄉巾  
幘中正大有人以是爲彤史光而并勛湘舫昆仲益砥礪名行備  
國家干城腹心之寄俾國人稱願亦若顏陶士行者曰非此母不  
生此子也是則太恭人之志也夫

旌表節孝章母易太恭人七十壽序

昔歐陽文忠謂善無不報而遲速有時蓋綜凡爲父母者之眾善言之也以余觀史傳所紀耳目所見聞凡節母之子孫類多賢且達其植節愈艱者食報亦加速蓋其事至苦其時日至長終其身隱閔嘿塞無復生人之趣非具士君子慎獨之學臨深履薄之精誠莫能矢諸畢世故其艱貞孤苦足以動天地泣鬼神而所以報之速者悉繇自然之理若文忠公其一也雖然豈獨文忠哉等而上之孔孟皆孤兒也彼至聖大賢猶藉母教以成立天蓋篤生是母是子以立萬世人倫之極然則凡爲節母子者尤宜知所自勵矣且夫三代以上女婦之傳者多以德後世多以節與才其以才



節見者所遭必有大不幸而最幸者莫若以其子之賢然德莫先於守身節正德之大者也不幸遺孤在樑宗祧與門祚如一髮之引干鈞則尤賴才以濟之昔人謂死易立孤難此其任實與寄百里之命等惟大節不奪而才復可任託孤斯其德乃益著而子若孫之賢則益可操券而必得是不幸中又將有其最幸者存焉幸不幸立節者不以爲加損理固不可誣也章母易太恭人定臣贈公之簪室重吾太守之生母也贈公精名法家言自浙遷楚生太守十有二日卽捐館舍賴太恭人以長以教以底於成人太守逾冠舉鄉貢司諡吾平學行爲多士式積功閥需次縣令晉丞牧加秩二千石太恭人旣以節孝被旌又疊膺封誥以今年二月

爲七十壽辰邑人士徵文以侑康爵余惟太守躬爲庠序師固以孔孟之道訓士者也記有之大孝尊親使國人稱願曰幸哉有子如此此非孔孟之所謂孝者乎太恭人以母道兼父師其清德足以覆露其子姓爲之子者旣託母蔭以自立矣尤必月征日遘堅然自砥於孔孟之道乃更足以其母傳然則太守所以悅親養志者固大有在而人世之顯榮光大抑不足言矣太恭人事嫡謹撫族人之女如已出慈惠好施予懿行不可殫陳而旣能以節與才厚植其德則他皆可從略矣元度少孤母氏亦以苦節著而志事汔無所成深用自疚故發此義以勸太守願益交勉焉以期無忝所生卽以是爲太恭人壽

張母黃太恭人七十壽序

古賢母傳指難畢數而莫著於東漢范滂之母其語滂曰汝今與李杜齊名吾復何憾千載下猶懍懍有生氣宋蘇文忠十歲時母程授以書至滂傳慨然太息文忠請曰軾若爲滂母許之否乎程笑曰汝能爲滂吾顧不能爲滂母邪繇今觀之忠義挺持之操軾誠不媿滂程亦不媿滂母也東晉卞忠貞公力戰殉國難二子吁眡繼之其夫人曰父忠子孝夫復何悲偉哉言乎抑何與滂母相脗合歟然則謂滂軾吁眡之賢皆成於母教可也張母黃太恭人爲故內閣協辦侍讀麓門先生之配先生以名進士倬直鳳池推嘉道間耆宿太恭人相夫子有賢聲詰嗣子摺別駕負奇才少爲

名諸生食廩餼足跡半天下所至必交其賢杰有陳同甫辛稼軒  
風而其攬轡澄清之志與孟博如出一轍也咸豐十年二月粵寇  
陷杭州別駕方官布政司照磨正衣冠題詩廨壁抱印就義事  
聞得 旨優卹如典禮先是八年冬君長子溥萬以諸生從李忠  
武續賓勦賊三河鎮力戰死綏矩君之殉職裁二年耳論者謂卜  
望之父子完貞復見今日而太恭人之遇乃適符滂母至一門兩  
世抒忠以衛社稷尤足與卞母相伯仲焉吾聞人之生也以道受  
命忠孝節義乃天地所以爲心而紀綱乎人道者太恭人翼子貽  
孫大節炳著祀在太常功在冊府事跡在史箴延世之賞與 國  
咸休非懿訓所成就不及此然則人世之寵榮所以顯揚而褒大

者舉不足言矣况季孫純生太守鬱負時望不忝門風而其儲志  
古文詞尤壹以韓歐蘇爲標準所到皆莫可量則所爲榮顯光大  
固又時有兼得者哉今年八月爲太恭人開八帨辰都人士躋堂  
拜母徵言以殉觴竊惟太恭人節萃一門名在千古實兼有范母  
卞母之名德謹揚推陳之備它日彤史之采而並以蘇文忠之志  
節文章爲太守勛太守試莊誦斯言以侑康爵太恭人其必以爲  
然哉

歐陽母毛太淑人八十壽序

貧富貴賤之遭有定數也造物者既予以秩然之分矣又常示以不測之機時或驟富且貴以鼓動奔走一世之人心而人之絲約而豐絲枯而苑者亦遂逐境而移不能不少易其素士君子蓋難言焉閨閣爲尤甚然既醉之詩曰釐爾女士從以孫子而周南之樛木則又曰樂只君子福履綏之夫后妃雖賢一婦人焉耳何以尊之曰君子而相與期其上者且以女子而有士行爲祝此非阿好而夸美也士君子於得喪窮通之際見理明而志自定常人爲境所動則約必濫樂必淫尠有能自克者况在婦人女子尤不勝其歆羨畔援之私有能如魯敬姜之深識定守則謂之士君子也

固宜歐陽母毛太淑人敬軒贈公之配靜山郎中之賢母也贈公性恬淡不問家人生產太淑人事舅姑孝家故貧佐餽必具甘膳姑六十後弱足病垂危太淑人扶持抑搔嘗七晝夜不交睫更闌卽顙天泣禱願減算益姑壽姑夢神告曰爾媳孝婦也天其有以報之病尋瘳登上壽贈公厭世後太淑人課其五子事耕讀室以內無惰容季君靜山得白圭計然之術業鹽筴聚致千金以部郎注選人籍增三秩請封其祖若父母太淑人游登大耋膺翟節之榮戚里皆華之而太淑人視昔食貧茹蓼時無幾微或改其操顧獨好施與歲癸亥邑大祲勛諸子轉粟平糶所全活甚眾臺使者書額表其門今年爲八十悅辰戒子孫罷筵讌以其資爲家廟

爲惜字社爲橋渡義舉此非士君子所難能而可貴者歟夫善無  
不報而遲速有時此君家文忠公紀其母行之言也太淑人之惇  
懇旣不後敬姜其致福祚也自不難與鄭太夫人相輝映而余所  
尤韙者則其繇困而亨處豐約初不改乎其度也靜山昆仲矢明  
發之懷夙興夜寐毋忝所生當亦無忘斯志歟太史公曰君子不  
爲約則修德滿則棄禮佚能思初安能惟始沐浴膏澤而歌咏勤  
苦斯言也蓋太淑人之所以稱君子稱女士而靜山昆仲之所以  
養志者諸不踰乎此矣試稱斯義以諗太淑人其必曰實獲我心  
哉